

Qasimlo Bîrmendeke
Şoreşvan û Aştîxwaz



Siyasî R. 4-6

Deqa Axavtina Birêz Mistefa
Mewlûdî, Endamê Deftera
Siyasî Ya PDK Îranê Di Rê
û Resma 17'emîn Salvegera
Şehîdbûna Dr. Qasimlo û
Hevalên Wî de



Siyasî R. 2

TÊGIHÊN FELSEFÎ



Çand R. 10

Kurdan Di 17'emîn Salvegera Şehîdkirina Dr. Qasimlo û Hevalên Wî De

TEROR û TERORÎSTPERWERIYA DEWLETA ÎRANÊ ŞERMEZAR KIRIN

Ji bo nişandana nerazîbûnê û şermazarkirina terora dewletî ya rejîma Îslamî a Îranê û yek ji wan terora hov û nemirovane ya Dr. Qasimlo û hevalên wî li ser maseya gotûbêjê di 13.07.1989'an de, xebat û çalakîyên şermazarkirinê li bajarên Kurdistanê Îranê û derveyî welat bi xurtî meşîyan. Li piraniya bajarên Kurdistanê gel ji daxwaza PDK Îranê ji bo xuyakirina nerazîbûnê û şermazarkirina terora dijî Dr. Qasimlo û hevalên wî ji aliyê dewleta Îslamî a Îranê xwedî derketin. Li piraniya bajarên mezin yên Ewropa û Waşingtonê meş û xebatên şermazarkirinê li hember Balyozxaneyên rejîma Îranê û Parlemanên welatên Ewropayê hatin lidarxistin.

Siyasî R. 6



Wêne - Mahabad: Daxistina tev dikan û bazarên bajar di 17'emîn salvegera şehîdkirina rêberê nemir Dr. Qasimlo û hevalên wî Wêneyên pêtir li ser malpera me bibînin

17'emîn Salvegera Terora Dijî Dr. Qasimlo û Hevalên Wî Li Binkeya Deftera Siyasî Hate Bibîranîn

Roja pêncşem, 22.04.1385 (13.07.2006)'an, 17'emîn salvegera terora dijî şehîdê mezin Dr. Qasimloyê nemir û hevrêyên wî, rê û resmeke hêja û berfireh bi beşdarbûna tev endamên rêberî, Kadro û Pêşmerge yên PDK Îranê li binkeya Deftera Siyasî a ve partiyê birêve çû.

Rê û resmê bi xwendina marşa niştîmanî a "Ey Reqîb"ê dest pê kir û piştê kurte filmek ku ji aliyê Beşa film ve li ser kesayetiya siyasî a Dr. Qasimlo û bir û hizra hin kesayetiyan siyasî û wêjeyî ên Kurd li ser wî rêberê mezin, hatibû amade kirin, pêşkêş beşdaran bû.

Di parek din a rê û resmê de birêz Mistefa Mewlûdî, Endamê Deftera Siyasî a PDK Îranê gotarek li ser raman û kesayetiya Dr. Qasimlo pêşkêş kir û di gotara xwe de ji rêz ji biranîna birêz Seyîd Selam Ezîzî ye nemir, endamê pêşîn ê Deftera Siyasî a PDK Îranê girtibû.

Li doma rê û resma han de bi awayê kors du sirûd ji



aliyê koma hunerî a PDK Îranê û miqamek ji aliyê birêz Behruz Lutfi ve, bi hinceta ji destdayîna rêberê mezin û zana yê Kurd Dr. Qasimlo hatin pêşkêş kirin û her di ve derheqê de ji helbestvanan: Şerîf Felah, Cemal Necarî û xatûna Trûske, hestên bi kul û keser ên xwe di çend parçe helbestan de anîn zîman.

Di dawîya rê û resmê de ji aliyê koma hunerî bi awayê kors sirûdek hat pêşkêş kirin.

Jin Di Yekemîn
Ceribîna
Hilbijartina
Kuweytê De

R. 7



Serdemê
Bav
Serdestiyê

R. 8



"ŞIROVEYA
DÎWANA
MELAYÊ CIZÎRÎ"
DERKET

R. 11



Deqa Axavtina Birêz Mistefa Mewlûdî, Endamê Deftera Siyasî Ya PDK Îranê Di Rê û Resma 17'emîn Salvegera Şehîdbûna Dr. Qaimlo û Hevalên Wî de

Hevalên xweştêvî!
Xûşk û birayên heja!
 Ez îznê dixwazim bi nûneriya Deftera Siyasî ya PDK Îranê

bixêrhatina beşdarên qedirgiran yên ve rê û resma bibîranînê bikim ku ji bo rêzgirtin ji bibîranîna şehîdê nemir Dr. Ebdulrehman Qasimlo, rêberê leheng û zana yê PDK Îranê pêk hatiye.

Îro bi hinceta borîna 17 salan ji ser terora dijî rêberê leheng û payebilind yê Partiya Demokrat, dîplomat û siyasetsvanê navdar yê Kurd, Dr. Qasimloyê nemir û 7 saliya wexera dawî ya ne biwext ya xebatkarê sozdar yê PDK Îranê, kekê Seyîd Selam Ezîzî, endamê Deftera Siyasî ya partiya me ye ku di roja 24'ê Pûşpera 1378'ê Rojî (15.07.1999) bo cara dawiyê xatira xwe ji hevçeper, gel, welat û malbata xwe ya heja xwest, em li dora hev civiyane. Beşdariya we di vê rê û resmê de rêzdanîna we ji bo wê rola giring û bibandor diyar dike ku her du wan ezîzan û nemaze mamostayê me yê nemir Dr. Qasimlo di berbipêşde birina xebata gel û partiye de dilistin.

Hevalên rêzdar!

Gelê Kurd û piraniya zaf ya xebatkarên siyasî û ronakbîr yên herêmê û gelek ji siyasetsvanên cihanê ku li pey pirsên siyasî di Rojhilata Navîn de digeriyan, kêma û zêde Dr. Qasimlo naskiribûn û rolê wî mêrê mezin di guhertinên siyasî ên herêmê de fêhm kiribûn. Bi taybet em şagird û hevçeperên Dr. Qasimlo, piranî ji nêzik ve yan bi sedema bidestxistina nivîsarên wî, her kes ji me li gor xwe şarezayîya nisbî li ser rolê wî mamostayê payebilind heyê. Heke em ji wêje û nivîsarên PDK Îranê re binêrin, em dibînin ku di piraniya herî zaf ya war û astan de bi dîtin, bir û ramanên wî mirovê mezin hatiye zengînkirin û PDK Îranê û tevgera Kurd bi giştî sûd û feydeyê zaf ji bir, fikr û ramanên wî rêberê payebilind wergirtiye.

Di heyamê wan 17 salan de ku mixabin bi cendek di nava me de nemaye, di salvegera jî dayikbûn yan şehîdbûna wî de û bi bone û hincetên cuda cuda ve, me gelek li ser jiyana siyasî û çawanîya tevlibûn bi xebata siyasî û xwendin û rolê wî di rêberîkirina PDK Îranê de axivîye û nivîsandiye.

Li vir em çiqas li ser wî binivîsinin, nikarin ji vê çendê pêtir bibêjin ku hetanî niha li ser de hatiye gotin û nivîsandin. Aliyê kêma eva ku ne di şîyan û karîna min de ye ez tiştêk pêtir bixim ser basa dîroka teji ji tekoşin û serfirazî û serbilindiyên wî rêberê mezin yê zana û siyasî.

Lewre ez rêyê dixwazim ku tenê min lêniherîneke dubare bi ser wan tiştan de

hebe ku heya niha li ser Dr. Qasimlo hatine gotin û nivîsandin û ez parek ji nêrin û ramanên wî careke din bixim ber bal û raya we ezîzan ku bûne xet û nişan ji bo partiye û xebatkarên PDK Îranê û ew tiştên ku di serdemê niha de girîngtir û hewcehiya wan zêdetir e, heke derfet hebe em pêtir li ser wan rawestî û bidin şîrove kirin.

Siyasetvanên gelê Kurd bi giştî û nemaze endamên PDK Îranê dizanin ku Dr. Qasimlo xebata xwe ya siyasî bi endambûn di refên Yekitiya Ciwanên Demokrat ya Kurdistanê Îranê de dest pê kiriye, ew rêxistina ku li serdemê avabûna Komara Kurdistanê hetanî niha jî mil bi milê tekoşîna ve partiye xebata siyasî û senfî ya xwe domandiye û ji bo piştewani ji siyasetsvanên PDK Îranê hezaran ciwan perwerde û elimandine û bi dehan û sedan kes ji wan bûn bi endamê PDK Îranê û rola çeleng û baş di jordecûna tevgera Kurd û birêvebirina erk û xebatên ve partiye de hebûye.

Dr. Qasimlo piştî hîloşîna Komara Kurdistanê yek ji wan kesan bûye ku ji destpêkirina xebata nepenî ya partiye de rol hebûye û bi taybet di refa pêşin ya wan kesan de bûye ku sala 1334 (1955)'an ji bo serbixwe kirina rêxistina Partiya Demokrat kar kiriye û xebitiye.

Rolê Dr. Qasimloyê rêber wê demê pêtir diyar û berçav dibe ku sala 1349'an ya Rojî, piştî derçûna daxuyaniya 11'ê Adara sala 1970'an ya Zayînî li pey bi fermî nasîna Otonomî bo Kurdistanê Îraqê, vedigere Îraqê. Di wî çaxî de ku mixabin Partiya Demokrat rastî gelek pîrgîrekan bûye ku bi micid li destê wan nalandiye, Duktur wekî hekim û mamostayê jêhatî bi alîkariya xebatkarên dilsoj yên din ên partiye ji wê delîveya heja ku wê demê derketibû holê, mifah stand û bi dunyayek ceribandî û derbazbûyîya siyasî û deryayek ji zanist û hûrbînî û radeyeke bêwêne ji tîkiliya kesîne, siyasî û zanistî tevî kesayetî û kom û komeleyên Kurd, Îranî û biyanî hewl û cehda bêrawestan daye ji bo saxkirin û zindîkirina rêxistinên partiye.

Bi gotina wan kesên ku wî çaxî şanaziya hevxeatbûn tevî Dr. Qasimlo hebûne, Dr. Qasimlo di vê dewranê de Ronesans di nava PDK Îranê de pêk anîye û canek taze daye peykerê nîve can yê partiye û ew jî ji ber çend sedeman bû. Berî hemû tiştêkê ji ber vê çendê ku kesayetî, nav û nasnav û rewşa wî ji bo hemû deste, girûp û baskên nava partiye cihê qebûlê bûye.

Piştê jî ji ber vê çendê ye ku bi hewse û hekimane tevî hemûyan û heta bi neyarên xwe ên herî tund ji hewil daye li dora armanc û bernamêyê kom bibin û ji tevan girîngtir rêyek ji ku Dr. Qasimlo xistiye ber ra û bala xebatkarên demokrat, ne tiştêk bûye ji bilî wê rêbazê ku ji



Birêz Mistefa Mewlûdî

destpêkê ve bi destê bihêz û xwedî şîyan yê Pêşewayê Şehîd, Qazî Mihemed nexşê wê hatibû kêşandin û rengê wê jî rijiyabû.

Di wî serdemî de hebûna Dr. Qasimlo di hemû waran de liqîneke mezin ji Partiya Demokrat re daye. Di heyameke kurt de partî bûye xwediyê rêxistin, bernamê û pêrew, rojnameya organî û jî hemûyan girîngtir biryara xwe ya siyasî. Dr. Qasimlo xebatkarên Demokrat hîni gelek tiştan kirine ku niha jî çirayê rênîşan yê rêya xebata me ne.

Wekî: parastina ûşil û qeîdeyên partiye, ser û berî û dispiln, bawerî bi xwe hebûn, bawerî bi girîngiya teşkilatî, bihadana herçiqas pêtir bi tîkiliya berfireh û zindî bi civatên xelkê re, liberçavgiirtina qazancê mezin yê netewî û niştîmanî û gorîkirina bidestxistiyên biçûk di rêya parastina destketinên mezin û vîca giştî de. Ji tevan girîngtir Dr. Qasimlo gelek nîrx û biha bi azadî, keramet û kesayetiya mirovan daye. Lewre digot: **"Di cîhanê de tu nemetek ji azadiyê binirxtir nine. Azadî keramet û kesayetiye dide mirov û rêyê nade bibe bi mohre. Divê mirov ji haletê mohrebûnê bihê der, bibe kesayetî, bibe kesek zindî û çeleng ya/ê civakê."**

Bi awayekî giştî Dr. Qasimlo rêberê xwedî şîyan, şîyar, zîrek û karjêhatî bû. Ew di gelek warên jiyana siyasî û civakî de bêwêne bû, Şoreşvan û Pêşmergeyê çîya û ronakbîr û nivîskar û darêjê siyasetsvanê giştî ên partiye bûye ku ji me re rênîşander bûn.

Dr. Qasimlo li hundir rêberê xelkî û popoler û li dunyaya derve dîplomatek şareza, pîspor û jêhatî bû. Gelek kesên biyanî li ser kesayetiya siyasî û karîna diplomasiya Dr. Qasimlo nivîsandine.

Li vir em dê tenê minakekê binin. **Canatan Rendal**, rojnamevanê mezin

yê Amerîkayî, dibêje: "Qasimlo take rêberê Kurd bû ku dikarî bi lêhatibûn û biwêrî ve tevî dewletekê bikeve gotûbêj û danûstandineke serbilindane. Şiûra siyasî û têkiliyên bi siyaseta û rojnamevanên Ewropî û yên din re wareke zanistî bi kesayetîya Qasimlo dabû ku li tu kesayetîyeke din yê/a Kurd nedabû." Piştî dibêje: "**Gelek Kurd li ser vê baweriyê ne, heke Dr. Qasimlo niha maba, dikarî karê hemû Kurdan ber bi pêş bibe**".

Hemû ev xisletane û gelek taybetmendiyên din ên Dr. Qasimlo bibûn sedema vê çendê ku Komara Îslamî, dijminê kindar yê gelê Kurd û Partiya Demokrat, kerb û kineke kevneperestane ya kûr ji Qasimlo hebe û hemû rêyan bo ji nav birina wî bigre pêş. Ewa bû ku mixabîn ji seha aştxwazane ya Dr. Qasimlo mifaha nebaş wergirt û bi wî awayê ku em hemû haydar in, kompoyek jê re hate darêtin û di roja 13.07.1989'an de li bajarê Viyan, paytexta Otrîşê bi destê terorîstên Komara Îslamî hate şehîd kirin.

Di rastî de rejimê dixwast bi ji nav birina Dr. Qasimlo, PDK Îranê ji holê rake, lewra jî nişane li serê partiyê girtibû. Lê rayedarên Îranê hesab ji bo roleke gelek bingehîn di karê rêberîya Dr. Qasimlo de nekiribû. Ew jî eva ku Duktur hergav hewil dida rolê takekesî di nava partiyê de biçûk bihê kirin û bihayê bi karê bikom û eqlê bikom û rêberîya bikom bihê dayin. Bi taybetî ew hizr, raman û rênîşandanên ku li paş xwe ji bo partiyê û xebatkarên Demokrat bicî hêlane, heke xwendineke dirust li ser bihê kirin û her yek ji wan di cihê xwe de mifah jê bihê standin, nek terorkirina kesayetîyeke weke Dr. Qasimlo, belkî hemû pîlan û komplo diji Partiya Qasimloyê mamosta û rêber dê vala û pûç bibin.

Gelî hevalan:

Dr. Qasimlo bi gotinên xwe ên bi nirx û şîretên mamostayane gelek xet û nişanên dirust ji me re darêtine ku heke xebatkarên Demokrat û şagirdên Qasimlo bi başî hîn bibin û li cihê hewce jê sûd û faydeyê werbigirin - ku ez di karîna xebatkarên partiyê de dibînim - ez piştrast im ku tu demekê gelê Kurd rastî bêhêvîtiyê nabe û şagirdên Qasimlo nasekinin û bi mifah wergirtin bi ceribandî û şiyana siyasî û hizrî ya Mamostayê xwe rêya çareserîya tev pirsgirêkan dê peyda bikin.

Dr. Qasimlo di gotinên xwe ên bihagiran de gelek micid tekez li ser vê çendê dikir ku heke gelek azadîxwaz be, divêt nirxa vê azadîyê jî bide. Xebat diji zilm û zordariyê jî bo Dr. Qasimlo pirsêke bingehîn bû. Di hevpeyvîn tevî Bêhroz Yûsîfzade de dibêje: "**Pirseke bingehîn ji bo min ku her ji destpêka ciwanîyê min jê re xebat kiriye, pirsê ji nav birina stem û zordariyê bûye.**" Bawerîyeke kûr û kemilî bi demokrasiyê hebûye û ji bo

cihgirkirina demokrasiyê di nava rêxistina partiyê de xebat kiriye. Di tu demekê de bihaya demokrasiyê li ber çavê wî ne kêmreng bûye û demokrasi weke take zamin û garantiya dabînkirina maf û azadiyan hesabandîye. Lewra gelek bi eşkere dibêje: "**Min demokrasiya herî xirab ji diktatoriya herî baş pê çêtir e.**"

Gelek xurt diji diktatorî, raman û bîra diktatorî û takekesperestiyê sekinî ye û derheq yekîtîya siyasî û fikrî de dibêje: "Xurtkirina yekîtîya siyasî û fikrî erkeke bingehîn e ku dikeve ser milê tev endamên partiyê. Xuya ye gişt endamên partiyê derbarê pirsên siyasî wekî hev nafikirin, armanc jî ne eva ye ku wekî hev bifikirin. Ji ber ku eva ne mumkin e û ne jî bi qazanc û berjewendiyê tekoşin û xebata partiyê



ye, merem ji vê yekîtîyê ne standina afirandina fikrî ji endamên partiyê ye. Hebûna bir û rayên cuda û li hevkerina demokratîk ya wan kilîta çareserkirina rast ya arîşe û pirsgirêkan e û sedema ber bi pêşde çûna partiyê ye."

Bi nêrîna Dr. Qasimlo bi giştî awayê herî baş yê rêberîyê di partiya me de têkiliyên zindî, rênîmayî û di encam de têgihjandin e.

Dr. Qasimlo teror wekî kiryareke biyom û diji mirovane dizanî û teror li her cihêkê û bi her merem û awayekê biba, şermezar dikir. Di rastî de Dr. Qasimlo sinc anî nava siyaseta û serxwebûna biryara siyasî ji bo PDK Îranê ji hemû tişteke din zêdetir hez kiriye. Ji bo derbazkirina rêxistina partiyê ji girêdayibûn bi rêxistinên din, gelek kar û xebat kiriye. Tu demekê delîve û fersend nedaye ku serxwebûna partiyê bikeve xeterê.

Ezîzino!

Tevî bibiranîna mamostayê me yê mezin, cihê xwe ye ku em yek ji xebatkarên sozdar yê PDK Îranê bibîr binin, ku di roja 15.07.1999'an bo cara dawiyê xatira xwe ji me xwast. Nemir kekê Seyîd Selam Ezîzî ku 7 salan berî niha di çaxêkê bêwext û di rewşekê de ku parti û gelê wî ji gişt demekê pitir hewcehî pê hebû, destê ecelê ji me stand.

Kekê Selam ew mirovê xudan îman û berxweder bû ku di sala 1979'an têkilî bi Partiya Demokrat ya Kurdistanê ve girt û ji bo tekoşina tev dem di refa PDK Îranê de dest ji hemû xweşiyên jiyanê û giştî pile û payeyeke dewletî berda û wekî Pêşmergeyekê refên PDK Îranê ji xwe re hilbijartin û bi karê berdwam û dilsojane û nişandana jêhatibûnê, piştî heyamekê tev pileyên rêxistinî qetandin û gihiştê pileya Komîteya Navendî û Politbiroyê. Berpirsiyariya dawî ya Kekê Selam Ezîzî, berpirsiyariya Komîsyona "Siyasî - Nizamî"yê bû. Bê guman ji dest çûna wî xebatkarî ji bo tevgera Kurd û PDK Îranê xisareke mezin bû û ji bo me hevçeperên wî ji kul û xemeke giran û dilşewat.

Hevalên hêja!

Di çaxekê de em rêberê xwe yê şehîd, Dr. Qasimlo û xebatkarê emegdar yê gelê me kekê Selam Ezîzî bibîr tinin ku ji caran pitir navber yê ketiye nava xelkê Îranê û rejîma Komara Îslamî û valahî û veqetiyaneke kûr di navbera desthilat û xelkê Îranê de heye, bi curekê ku piraniya zaf ya xelkê Îranê vê rejimê bi ya xwe nizanin û hêviya ji navçûna wê dikin û heke derfet ji wan re jî pêk were, amade ne çelengane diji vê rejimê xebatê bikin û bihilosînin. Serbarê yê yekê ku bi sedema jordecûna bihaya nift (petrolê) di van du sê salên borî de Îranê pitirî 40 milyar Dollar paşketa

diravî heye, lê rewşa aborî ya welat gelek xirab e û xelkê Îranê ji destê giranî, jarî û destkurtiyê di welat de bêzar bûne û rastî dijwariyan hatine. Kiriz û pirsgirêkên cuda cuda ên siyasî, civakî û çandî hene û nebûna azadî û hebûna perçiqandinê xelk bi tevahî aciz kiriye. Lewra heke em bi pivanên demokrasîyê jî rejîma Komara Îslamî re binêrin, demak dibe ku vê rejîmê rewayî û meşrûiyeta xelkî ya xwe jî dest daye û bi darê zorê xwe bi ser xelkê de sepandîye. Em piştrast in heke derfet û fersendeke herî kêr hebê, xelkê Îranê dê vê sistemê bi awayekî giştî ret û mandel bikin.

Serbarê vê çendê ku serkut û givaş bi ser xelkê Îranê gelek zaf e, lê bi vî halî jî xelk bi awayê cur bi cur di derfetên herî kêr û mumkin de, nerazibûnê xuya dikin û meş û xwenişandanan lidar dixin. Li vir hêja ye em qala 2 nimûneyên berçav bikin ku her du di meha Pûşperê ya sala çûyî qewimîn:

Meş û serhildana şoreşgerane ya xwendekarên zanîgehên Tehranê û serhildana xwendekarên çend zanîgehên din di piştgirî jî tevgera xwendekarî di 09.07.1999'an. Ya din jî serhildana şoreşvanane ya xelkê Kurdistanê ye ku ew jî di 09.07.2005'an de ku bi şehîd bûna Şiwane Seyîd Qadirî li bajarê Mehabadê dest pê kir û piştî piraniya bajarên Kurdistanê vegirt û li her bajarekê de hetanî heyamekê didoma. Mixabin herçiqas her du liv û hereketên han jî aliyên kirêgirtiyên rejîma Melayan bi xwînê hatin verdan, lê girîngî û bihaya wan serhildana li vê çendê de ye ku ne xwendekarên zanîgehên Îranê û ne xelkê Kurdistanê netirsîyan û heya ji bo bidestveanîn û dabinkirina xwastek û daxwaziyan xwe her mikum bûn.

Di asta navneteweyî de jî rejîm rastî pirsgirêkên pêtir bûye, maytekirin di kar û barên dewletên Felestin û Îraqê de gelek ji caran eşkeretir e. Eva ji ber çavê kom û komeleyên siyasî û navneteweyî, nemaze dewletên xwedî biryar bizir nabe. Her wiha hewl û xebatên rejîmê jî bi zengînkirina Uraniyûmê û aqîbet bidestxistina çeka Etomî jî ber raya dunyayê nahê veşartin. Bi kurtî em dikarin bibêjin, dewletên berpîsyar û xwedî biryar bi hev re karê micid dimeşînin, bona wê çendê ku rejîma Komara Îslamî çekên Etomî ne bidest bixe, ew jî ziyar û zirareke zaf ji hitbara rejîmê û diplomasiya Komara Îslamî dide.

Hevalino!

Partiya Demokrat dikare bi karê bikom, eqlê bikom, yekdilî û hevdengî û mifahwergirtin ji bir û ramana Dr. Qasimlo ku wekî mîrateke bihagiran jê re bi cî maye, di nava xwe de valahiya Dr. Qasimlo û hevçeperên jêhatî û ji dest çûyî tijî bike û bi mifahstandin ji wan warên baş ku niha derketine rojevê û ev îmkana propagandeyê ku di dest de heye, berdewam û çalaktir ji caran xebata siyasî, diplomasi, rêxistinî û gelî bimeşîne û pitir û çêtir ji caran dijî dijmin raweste ku eva hem dibe sedema hevîdarbûna xelkê Kurdistanê û hem dibe maya asûdebûna ruha bilind ya Dr. Qasimloyê mamosta, kekê Selam Ezîzî û tev şehîdên rêya azadî û bexteweriyê.

Silav ji mamostayê me yê rêber, Dr. Qasimlo di 17'hemîn bibîranîna şehîdbûna wî de.

Silav ji bo canê kekê Seyîd Selam Ezîzî, bi hinceta heftemîn bibîranîna ji dest çûna wî.

Silav ji canê paqij yê hemû şehîdên Kurdistanê û berdewamî ji bo rêya teji serbilindî a wan.

Mirin û neman ji bo kevneperestî û terorîzmê.

Qasimlo Bîrmendeke Şoreşvan û Aştîxwaz

Cemil Kulahî

Di demekê de ku şoreşa netewî ya Kurd li Kurdistanê Îranê jî bo bidestveanîna mafê

netewî û rewa yên xwe bi sedema tepeserkirina bêrehmane ya desthilatên zal bi ser Kurdistanê de rawestiya bû û dengê mafxwaz ye vê netewa çewisandî bi awayekî ne mirovane fetisandibû, hatina Dr. Qasimlo bi nava qada xebata netewî, wekî bêhna mesîhiyayî bû ku ser li nû caneke taze li ber tevgera Kurd hate kirin, kete livînê û



careke din vejiya. Ev jî vedigere bo vê çendê ku Dr. Qasimlo demake zaf li welatên Ewropayî mijûlê xwendin û lêkolînê bû, ji bilî vê yekê mamostayê zanîgehê bû, wekî miroveke xwendekar, akademîk û dunyadîtî jî pirsgirêkên cur bi cur dinêrî, bi taybet pirsên têkildar bi şoreşa Kurdî. Lewra hemû hewl û tekoşîna wî eva bû ku rêyeke çareserîya zanistî û hemdem, ji bo çareserkirina pirsgirêka Kurd peyda bike. Ev cure nêrîn û ramane tişteke nû bû ku wî rêberê mezin dixwast bine bo nava şoreşa Kurdan û jê re bike bîngehek. Ji ber ku bi sedema vê çendê ku tevî siyaseta cihanî û dunyaya derve û her wisa bi siyaseta hikûmetên zal bi ser Kurdistanê û herêmê de nasyarî hebû. Şarezayîye kemilî li ser jeopolîtîk û hilkevta demografiya Kurdistanê û giraniya siyasî ya Kurd hebû û siyaseta û rêzaniyên xwe li ser wan rastiyane didarêt, çunkî karê siyasî li gor ramana Dr. Qasimlo, xwediyê sê xwasmaniyên sereke bû, ku hetanî wê demê di nava tevgera Kurdî de nedihatîn ditin, lewra ji bo cihgîrkirina wan di nava bizava Kurd de cehd û hewla bêrawestiyan di da:

1. Rastdîtî di siyaseta de
2. Serxwebûna biryardanê di siyaseta de
3. Cihgîrkirina exlaq (sinc) di siyaseta de

Dr. Qasimlo hemû demekê ev yeke dubare dikir ku **siyaseta hunera mumkin** e û digot ku xala jar û qels ya tevgera Kurdî eva bûye ku hetanî niha yan **hemû tişteke** xwastiye yan **çî tişteke**, lewra digot siyaseta ne **reş û sipî** ye, belkî di navbera reş û sipî de rengê din jî hene. Bi bawerîya Dr. Qasimlo siyaseta kirin tevî hevîyan cudahiyeke kûr heye. Çunkî bi bawerîya wî siyaseta pêwendî bi rastî û heqîqetên hundirîn, herêmî û cihanî ve heye û bîngeha hevîyê jî li ser xeyalê ye, ku eyan e xeyal û rastî du tiştên bi tevahî li hev cuda ne. Wî rêberê mezin di hilgirtina dirûşmên xwe de, daxwaziyan xwe de û bi giştî di siyaseta kirinê de rastiyên hundirîn, herêmî û cihanî analiz dikir û piştî nirxandîneke zanistiyane raya xwe dida xuya kirin. Hebûna ramanên wisan di siyaseta de karek kiribû ku Dr. Qasimlo dirûşmekê hilbijêre ku ne tenê jê re cî bi cî bibe, belkî tevî rastiyên Îranê bi giştî û bi taybetî Kurdistanê de hev bigire, ji ber ku xwe di pêxema wan dirûşm û daxwaziyan de bi berpîrs dizanî û digot ku em **partiyek berpîrsyar** in, lewra ye divêt di hemû waran de em **berpîrsane** bilivin û tevbigerin.

Teybetmendiyêke din ku Dr. Qasimlo di kar û xebata siyasî de li ser de biîsrar bûye, **serxwebûna biryardanê di siyaseta de** bû. Ji ber ku wî jêve bû ku tu aliyê herêmî û navneteweyî bi radeya rêber, partî û aliyên siyasî yên Kurdistanê li ser rastiyên zal û balkişandî bi ser Kurdistanê de ne şareza ne, lewra eva ku divêt biryarê bide, rêber, partî û aliyên siyasî yên Kurd in û tu kesê heq nine û nikare bêy wan û raya wan li ser Kurdistanê biryarê bide. Yek ji wan sedeman ku wî li ser serxwebûna siyasî biîsrar bûye, eva bû ku karê siyasî û siyaseta kirin ji bo çawanîya

birêvebirina welat û parastina véc û berjewendiyên natewî ye, ku bêy serxwebûn di biryardanê de ev du tişt cî bi cî nabin. Di şirovekirina pirtûka "Basek kurt li ser sosyalîzmê" de wiha li ser girîngiya serxwebûnê diaxive: "Em seba dostîniyê qet dest ji serxwebûna xwe û qazancê neteweya xwe ber nadin, lê li ber xetera serxwebûn û qazanca neteweya xwe heke hewce be, em dê dest ji dostîniyê berdin. Lewra pîvan ji bo me qazancê partiyê, gelê Kurd û gelên Îranê û serxwebûna me ye. Pîvana bingehîn serxwebûna biryardanê ye, em dostîniyê dikin, lê tevî parastina serxwebûnê, heke hewce bû em dostîniyê gorî serxwebûnê dikin, lê em tu demekê serxwebûnê gorî dostîniyê nakin". Her ji ber vê sedemê bû ku Dr. Qasimlo gişt demekê li ser bingeha rêz girtina du aliyanê pêwendî tevî aliyanê din pêk aniye.

Taybetmendiya sêyemîn ku di siyaseta Dr. Qasimlo de diyar e û bi xwe ji baweriyê kûr pê re hebûye **exlaq di siyaseta** de bû ye. Lewra di wî warî de diji her cure bêûsil û bêqeydê, gotinên kirêt û nexweş û fend û fêlîyê di siyaseta de bû. Lewra di kar û xebata siyasî de bi kiryarên insanî, wêjeya gelî û popolistî û paqij baweriyê kûr hebûye. Di wî warî de bi xwe jî dibêje: **"Em bêûsil û bêqeydê û dijûndanê di siyaseta de ret dikin û ji bo cihgirkirina sinc di siyaseta de dixebitin"**.

Bi sedema hebûna van cure nêrîn û ramanane di karê siyasî de ye ku Dr. Qasimlo ji şer re wekî taktîk dinêre, taktîk ji bo gihîştin bi aştî û tenahiye. Çunkî li ser vê baweriyê bû ku Kurd ne xwediyê wê hêzê ye ku bikare dijminê bi tevahî teyar bi çekên nûjen ji nav bibe, lewra divêt Kurd şerê çekdarî wekî taktîk ji bo mandîkirina dijmin bi kar bîne, heta wê demê ku dijmin neçar bi gotûbêjê be. Gotûbêj û diyalog bi baweriyê Dr. Qasimlo wekî awayek ji şeklên xebatê dihatê dîtin, Dr. Qasimlo jêve bû her aliyekê ku bawerî bi vê yekê nebe **deriyê siyaseta** li ser xwe de girê daye. Di wî warî de, li ser girîngiya gotûbêjê dibêje: **"Di rastî de ez bona gotûbêjê şer dikim, çunkî em dibêjin pirsgirêka Kurd re çareseriyê leşkerî tune ye"**. Li ser vê bingehê bûye ku hemû demekê di çaxê xebata diplomasiyê û têkilîkirin bi welat û aliyanê din ve daxwaza piştgiriya siyasî ji doza Kurd kiriye ku eva tiştê e ku di nava şoreşa Kurdan de nû ye. Lewra Dr. Qasimlo ji bo bidestveanîna piştgiriya siyasî ji tevgera Kurd di asta cihanî de hewl û bizaveke zaf dide, bo minak têkoşîna bê nimûne ya diplomasiyê ji bo pêkanîna konferanseke navneteweyî bo çareserkirina pirsgirêka Kurd rê xistibû ku eva jî vedigere bo wê ramanê ku wî jêve bû ku divêt pîrsa Kurd di forma hundirîn û herêmî bihê derxistin û bibe pîrseke navneteweyî. Di wî warî de digot: **"Divêt em ji tev wan kesan re ku guhdariya gotinên me dikin, bibêjin ku daxwaza Kurd gelek sade û rewya ye, Kurd mafê xwe yê netewî dixwaze ku di Carnameya Gerdûnî ya**

Mafê Mirovan de hatiye, wate tiştê ne zêde ye, lewra bo minak daxwaza Otonomiyê pîrseke ne hundirîn e. Li gelek ji welatên weke dewleta Îranê de heke basa Otonomiyê tê kirin, dibêjin ew dozeke hundirîn e û ne mafê tu kesekê ye ku dest têwerde û pêre tevbigere. Lewra pîrsa Otonomiyê, ne meseleyeke hundirîn e û parek ji mafê mirovan e. Lewra ji ew dewlet, rêxistin û kesayetiyên ku xwe bi aligirê mafê mirovan dizanin, hewce ye ji daxwazên rewya yê neteweya Kurd piştgiriya bikin." (Rojnama KURDISTAN, hejmar 187)

Ji bo gihîştin bi vê meremê, yanî cihanîkirina pirsgirêka Kurd, bi vekirina bîroya nûneriyê ji PDK Îranê re li welatên cuda cuda, têkilîkirin bi partî û aliyanê siyasî yê welatên derve, lidarxistina civin û sêminarên cur bi cur û hevpeyvîn tevî medyayên giştî li ser pirsgirêka Kurd, karî bi başî pirsgirêka Kurd bi welatên derve bide naskirin, ku encam, véc û qazancên bihagiran yê wan awayên xebatê her zû derket û bandoreke erênî li ser pirsgirêka Kurd danî.

Dr. Qasimlo ji bo pêşdebirina vê siyaseta rast û dirust ku girtibû beriya xwe û cihgirkirina wan di nava tevgera Kurd de, di hundirê vê tevgerê de ji hewl û xebateke bêrawestan bo guhartina dida, ji ber ku vê tevgerê di hindêk waran de hewcehî bi reforman hebû. Her wiha ji bo derketina rûçikê delal û xweşik ji vê tevgerê re li rex raya giştî ya derveyî welat, pêwîst bû tevgerê ji hinek kar û kiryarên ne mirovane û biyom dîr be û paqij biparêze. Ji ber ku dizanî ku dunya ji tevgerê re ku tîkel bi karê ne mirovane bibe, piştgiriya siyasî nake. Xebat diji terorîzmê, diji nasyonalîzma berçavteng, xebat ji bo cihgirkirina demokrasî û bihayên nûjen û modern di nava tevgera Kurd de, xebat diji her cure cudahidananê zayendî, ragezî, olî û netewî, diji her cure takekes perestiyê û hwd... ji wan nixra bûn ku Dr. Qasimlo bêrawestiyar hewl dida ku bîne nava tevgera Kurd de.

Dr. Qasimlo hemû demekê eva dubare kiriye ku ji bo gihîştin bi armancên pîroz û rewya, divêt alava pîroz û rewya bihê bikar anîn, çunkî li ser vê baweriyê bûye ku tevgera Kurd, bizaveke berheq e û tevgerê ku di rêya mafên mirovî yê neteweyên bindest de serî hildaye, lewra nabe rûçikê vê tevgerê bi sedema karê terorîstî ve ku bi **alava ne pîroz** li nav dike, di nava raya giştî ya cihanê de xirab bihê kirin. Lewra her çiqas Dr. Qasimlo rêberê partiyê çekdar bûye û şerê çekdarî meşandiye, lê hevdem tevî vê çendê reşkuştin, êxsir kuştin, lédan û îşkence, teror, rehingirtin, revandina balafirên û teqandinê mehkûm û şermazar kiriye. Lewra ew şerê ku Partiya Demokrat dikir di şeklê rûyekî û

naverokê de tevî terorîzmê cudahiyeke kûr hebûye. Dr. Qasimlo derbarê wî şerî ku PDK Îranê dikir, digot: **"Nabe bîra me biçe ku Pêşmerge di pêxema bidestveanîna wan armancên gelê Kurd xebatê dike ku dijminê azadiyê ne amade bûn bi aştîyê wan qebûl bikin û ji bo perçiqandin û binpêkirina daxwaziyan gelê Kurd êrîş kirine û şer bi ser xelkê Kurdistanê de sepandin. Lewra şerê Pêşmerge bo berevani ji azadiyê, şer di pêxema mafêke rewya de ye û di encam de şer ji bo gihîştin bi aştîyêke serbilindane û adilane ye"**. Eva naveroka şerê ye ku Partiya Demokrat kiriye, lewra ye ku wî rêberê zana hesaba xelkê sivil û bê berevan ji hikûmeta serkûtker ya Melayan cuda dikir û diji pêkanîna tirsê bo ser jiyana xelkê sivil bû. Li ser vê bingehê bû ku terorîzm û tevgerên netewî ji hev cuda dikirin û di navbera wan de cudahî didanîn, digot eva du tiştên ji hev cuda ne, li ser vê yekê tekez dikir û digot: **"Terorîzm û tevgerên rizgarîxwaz yê netewî du pîrsên cuda ji hev in, di şerê çekdarane yan partîzanî de ji bo azadiya neteweyekê penabirin bo ber terorîzmê ne hewce ye. Berevajî ez bawer im tevgerên bihêz, ew tevgerên ku di rêyên demokratîk de diçin, rênûmayî tînin kirin, aligirî û piştgiriya xelkê bi wan re ye, tu hewcehiya wan ji bo penabirin bo ber terorîzmê nîne"**.

Dr. Qasimlo hetanî wî cihî çarçoveya şermazarîkirina terorîzmê berfireh dike ku ew rêxistin û partiyên Kurdî ji ku stîratêjiya xwe li ser vê bingehê ava kirine, vedigere û dibêje: **"Armanca wan tevî armanca tevgera rewya ya Kurd ne yek e"**. Çunkî cuda ji vê çendê ku tîrsa xirabûna rûçikê tevgera Kurd di nava bir û raya giştî ya cihanê de hebûye, tîrsa vê çendê jî hebû ku hikûmetên desthilatdar bi ser Kurdistanê bona vê yekê ku bizava Kurd bêitbar bikin û hêcetê ji bo militarîzekirina Kurdistanê binin û xwe wekî parêzerê azadî û mafê xelkê bidin xuyandin, ji kiryarên terorîstî ku ji aliyanê wan girûpane diqewimin, mifaheke nebaş bistînin, lewra gişt çaxekê ev yeka ji hêzên Kurd re dubare dikir û rênîwîni dikirin.

Dr. Qasimlo cuda ji vê çendê nasyonalîzma berçavteng jî ret dikir û li ser dostîniya navbera gelan de tekez dikir û bêrawestiyar ji bo yekîtîya navbera neteweyên bindest yê Îranê hewl û cehd dikir û bo ji hev nêzîkirin û tîkilîyên dostane di navbera wan neteweyan de dixebitî. Dr. Qasimlo li ser vê baweriyê bû ku hevalbendên stîratêjîk yê me, neteweyên bindest yê Îranê ne. Her wiha gihîştibû baweriyê ku tenê bi hev girtin û hev xebatîya neteweyên Îranê ye ku sistemeke demokratîk di Îranê de cihgir dibe. Di wî warî de dibêje: **"Tevgera gelê Kurd her çiqas bihêz jî be, aliyanê zaf tenê dikare rejîmê jar û rêyê ji bo hiloşandina rejîmê xweş bike, lê tu demekê nikare bibe**

altirnatîv, lewra me berdewam hewl daye ku pêwendîya navbera tevgera gelê Kurd û gelên din yê Îranê xurt bikin."

Lewra di demên dawîn yê jiyana xwe de tevî vê çendê ku berevaniyê ji mafên Kurdan dike, li ser dabînbûna mafên neteweyên din jî tekez û îsrarê dike. Bi anîna navê wan netewane, dibêje: **"Heke îro pîrsgirêka wan netewan çareser nehê kirin, di pêşerojê nêzîk de divê em li benda bûyerên nexweş bibin"**. Ev raman û hizre vê rastiyê derdixe holê ku Dr. Qasimlo nasyonalîzma berçavteng bi tirs bo ji hev belavbûna xebata mafxwazane ya gelên bindest yê Îranê û her wisa bi rê xweşkirin ji bo pêkhatina bira şovenîstî û mezinxwaziyê zaniye, ku eva bi xwe dibe berband û astengek li ser rêya hevgirtina neteweyên Îranê û ji hev dûrketina wan. Lewra Dr. Qasimlo bo berlêgirtin ji serhildana nasyonalîzma berçavteng û her cure mezinxwaziyekê, dixebitî ku tevgera Kurd demokratîze bike, lewra digot xebata me bi tenê ne **neteweyî** ye, belkî xebateke **neteweyî demokratîk** e. Ji ber ku Dr. Qasimlo li ser vê baweriyê bû ku mirovê/a demokrat, mirovan ji her netewe, regez û olekê bibin, ji wan re wekî hev dinêre û dixebite ku nîrxên mirovahiyê di nava civakê de pêşde bibe. Lewra derbarê girîngiya demokrasiyê di nava şoreşê de digot: **"Nabe tu demekê xebat ji bo demokrasiyê biçê bin xebat ji bo mafê neteweyî yan xebata tex û çinayetiye"**. Eva wê rastiyê derdixe holê ku Dr. Qasimlo demokrasi bi kilita çareserîya pîrsgirêkan dizanî, lewra bê westîyan hewl dida ku demokrasiyê weke bîngehekê bîne nava tevgera Kurd. Dr. Qasimlo bo ji holê rakirina berçavîya takekesperestiye di nava tevgera Kurd ku jêve bû, astenga sereke ya cihgirbûna demokrasiyê di nava vê tevgerê de ye, cehdeke zaf da ku vê ramanê du vêc û qazanc di şûnde hebû: 1- Negirêdana tevgerê bi takekes, 2- Perwerdekirina mirovên biwêr, netirs û çeleng. Lewra digot: **"Di cihanê de tu nemetek ji azadiyê ne binirx û pîroztir e. Azadî keramet û kesayetiye dide mirovan û rêyê nade mirov bibin bi muhre ... mirov divêt ji haletê muhrê de bihê der, bibe kesayeti, bibe keseke/a zindî û çeleng yê/a civakê"**.

Ji bilî vê çendê Dr. Qasimlo bo ji navbirina her cure cudahîdananeke zayendî diji jinan xebitiye û bo ji navbirina bînpêkirina mafê jinan hewl û bîzav kirîye ku di vî warî de dibêje: **"Jin nîviya civakê ne. Her çiqas jin kêmtir di kar û barên civakê de beşdar bibin, ew qas kar, tekoşin û afirandin di civakê de kêmtir e û her ew hinde jî civak paşverûtir e. Lewra radeya beşdar bûna jinan di hemû warên jiyana civakî û siyasî de, nîşana pileya pêşketina her civakê ye."**

Ev cure bîr kirine demokratbûn û nûjenbûna wî rêberê mezin nîşan dide ku bi anîna wan rêbazên rast û biçeide û azin bi nava tevgera Kurd, bû sebebê vê çendê ku tevgera Kurd bikeve ser rêbazê nûjen û hemdem. Rêbazek ku bû sebebê pêşdeçûna roj li pey rojê ya PDK Îranê wekî pêşengê tevgera Kurd li Kurdistana Îranê. Lewra divêt em bîr û rêbaza Dr. Qasimlo û rêniwîniyên wî rêberê mezin ku bang û gaziya wî pêkanîna civakêkê pêka biha û nîrxên mirovî dikir, bi kiryar di nava civakê de xurt bikin, pêşde bibin û her wiha wan cihgir bikin.

Werger: Azad Kurdî

Di 17'emîn Salvegera Terora Dijî Dr. Qasimlo De, Pêlên Nerazîbûnê Tev Kurdistan Bi Xwe Ve Girt

Di tev bajar, bajarok û herêmên cur bi cur ên Rojhilata Kurdistanê de hate ragihandin ku piştî belavbûna bangewaza PDK Îranê ku tê de

daxwaz ji xelkê hatibû kirin di roja pêncşem, 22'ê pûşperê de ji bo rêzgirtin û bibîranîna Dr. Qasimlo û hevrêyê wî Ebdula Qadirîazer, nerazîbûna xwe bi diji rejîma terorîstperwer a Îranê bi daxistina dikan û temirandina çirayan bo dema 3 deqîqan nîşan bidin, demjimêr 23'ê haman rojê de û di bersiva



Bajarê Mehabadê

daxwaza han de, pêlên nerazîbûnê bi diji Komara terorîstî a Îranê ji deryaya xelkê Rojhilatê Kurdistanê bilind bûn.

Li gor agehiyên gihiştî bi me, xelkê piraniya bajar û herêmên cur bi cur yê Kurdistanê di bersiva daxwaza PDK Îranê de bi awayekê bê wêne dest avêtin daxistina dikan û bazaran û çirayên malên xwe seet



Daxistina dikan û bazarên Mehabadê

23'ê heta 23:03 deqîqeyan temirandin. Her wiha dirûşm û belavokên PDK Îranê û wêneyên şehîd Dr. Qasimlo bi awayekî berfireh hatin belav kirin.

Çalakiyên han di wan herêmên ku di jêr de tên berçavtir bûn:

Urmiye, Selmas, Pîranşar, Nexede, Şino, Mehabad, Boka, Bane, Serdeşt, Rebet, Sine, Merîwan, Diwandere, Nûdşe, Kirmaşan, Gilana Rojava (Gilanê xerb), Serpilzehav, Kamyaran, Kerend û Qesrşîrin.

Di Xwenîşandana Viyenê De Kurdan Daxwaza Xistine Rojeva Dosya Terorkirina Dr. Qasimlo û Hevalên Wî Kirin

Bi hinceta 17'emîn salvegera terora diji Dr. Qasimlo û hevalên wî û her wiha xistine rojeva

dosyeya vê terora nemirovane pêtir ji 1000 kes ji Kurdên rûniştîyê welatên Ewropayê, xwenîşandaneke li Viyena serbajarê Otrîşê pêk anîn. Di vê meşê de ku ji aliyê PDK Îranê û Yekitiya Cîwanên Demokrat a Kurdistana Îranê ve hatibû lidarxistin, Kurdên hemû parên Kurdistanê, hin rêxistinên Îranî weke "Ekseriyet" û nûnerên PDK û YNK jî amade bûn.

Pitir Pilîts dibêje Ehdmedinejad di trokirina Dr. Qasimlo de dest hebûye Parlemantarê endamê Partiya

Keskan ya Otrîşê, Pitir Pilîts di hevpeyvînekê de ragihand ku wî belge û girovên rast û dirust di pişikdariya Serok Komarê niha yê Komara Îslamî li terora diji Dr. Qasimlo ji dest de hene. Navhatî herwiha da zanîn serbarê wê ku dewleta Otrîşê haydarê gotûbêjên aştîyê di navbera Îran û PDK Îranê de bû, cihê heyrîmayiyê ye ku çawa û çima dewleta Otrîşê erkê parastina rêberên Kurd bi cih neaniye.

Dr. Ebdulrehman Qasimlo rêberê gelê Kurd û Sekreterê Giştî yê PDK Îranê, Ebdulah Qadirî Azer nûnerê vê partiyê li derveyî welêt û Dr. Fazil Resûl, li 13.07.1989'an de li dema danûstandin ji bo çareserkirina pîrsa Kurd li Kurdistana Îranê, ji aliyê nûner û diplomatên terorîst yê rejîma Îslamî ya Îranê ve hatin teror kirin.

Jin Di Yekemîn Ceribîna Hilbijartina Kuweytê De

Pîştî şoreşa Fransayê û pesendkirina Qanûna Bingehîn û danezana gerdûnî ya mafê mirovan û

welatibûnê di 26'ê Tebaxa sala 1789'an de, esla wekheviya navbera tev welatiyan hate pejirandin. Lê di şoreşa Franse de mafê welatibûnê ji bo jin û jar û belengazan bi fermî nehate naskirin û tenê mafê dengdanê ji tevahiya mîran re bi fermî hate nasîn. Derheq mafê dengdanê ji bo jinan divêt em hetanî sala 1944'an ya Zayînî yanî aliyê kêm 150 salan paştî şoreşa Fransayê çavniher bin heya mafê

wekhevî yê jinan bi fermî tê naskirin û esla yek kes û yek deng û wekhevî di siyasê de tê îlan kirin.

Derbarê rola jinan di xurtkirin û berbipêşdebirina demokrasiyê de, sedemên zaf yên çandî, civakî û siyasî di holê de ne ku renge hindek caran tevî hev natebahî hebin, sedemên wekî bajar akincibûnê, zafbûn û jordecûna pileya zanin û xwendewariyê, pêşketina demokrasiyê di yasa û di jiyana civakî de, pitirbûna "NGO"yan, hezkirin û biîsrarbûna jinan ji bo beşdarî di warên civakî û pejirandina serxwebûna hêdî hêdî ya jinan wekî welatiyêke azad û pêkhatina wekheviyê di navbera kargeh û karkirinê li derveyî malê û bi taybetî piştrastbûna jinan bi heza xwe û jordecûna asta hişyariya siyasî a jinan û rola perwerdehî û bandorekê ku dikarin li ser evlad û hevjinên xwe de pêk binin, ji sedemên erênî û bibandor yên cihgirkirina demokrasiyê di welat de ne.

Di hemû welatên cihanê de jin nivîya pêkhatiya nifûsê pêk tinin. Di Rojhilata Navîn bi giştî û nemaze di welatên Erebi de jin ji mafê qanûnî, hiqûqî û mirovî ên xwe bêpar in. Di wan welatan de rejimên paşverû bi awayê hewce û jêhatî tevî yasa û rê û cihên navneteweyî mafê jinan jî barçav nagirin û rê nadin ku jin rola bingehîn ya xwe di giştî warên siyasî, civakî, çandî û hwd ... li civatên de bilizin.

Li pey hatine rojeva projeya Rojhilata Navîn ya Mezin û basa demokratizekerina van welatane bi awayê micid ji aliyê dewletên mezin yên cihanê ve, dewletên paşmayî û kevneperest bi xwe ketine û dixwazin bi pêkanîna hinek guhartinan xwe tevî vê pêvajoyê rê bixin. Bo minak di nava du salên dawiyê de nêzik bi 12 hilbijartin di welatên girtî û paşverû yên Rojhilata Navîn de hatin lidarxistin.

Kuweyt yek ji wan welatan e ku mafê dengdana jinan û beşdarî û çalakiya jinan di civakê de qedexekiribû û jinên wî welatê Erebi nedikarin post û berpirsiyariya hikûmetî û fermî li stû bigirin. Lê Parlemana Kuweytê bo cara yekemîn di dîroka xwe de di meha Maya sala 2005'an de, mafê dengdan û berbijarî di hilbijartinan da jinan. Li pey girtina vê qanûnê de, jinên Kuweytê di roja 4'ê Avrîla 2005'an de, di hilbijartina şaredariyê de deng dan.

Di roja 29.06.2006'an de, bo cara yekemîn di dîroka wî welatê de jinan karin di

Çinûr Qadirî



Roja 29.06.2006'an, jinên Kuweytê di halê rawestan ji bo dengdanê. Eva cara yekemîn e ku jin dikarin di hilbijartina Parlemana Kuweytê de xwe berbijar bikin û deng jî bidin.

hilbijartina civata qanûndana welatê Kuweytê, yanî Parlemanê beşdariyê bikin.

Xala balkêş ya hilbijartinên Parlemana Kuweytê a vê carê, xwe berendamkirina 28 jinan li rex nêzik 250 berbijarên mîr ji bo bidesveanîna 50 kursiyên Parlemana wî welatê bû. Berendamên wek **Rola Deştî** (Duktora ji Zanîngeha Hapkinza Amerîka), **Fatme El Ebdalî** (Duktora ji Navenda Lêkolîna Jîngehê), **Xalide El Xedar** (Duktora tenduristiya giştî) û **Nebîra El Necarî** û ... ji jinên herî xuya yên vê gerê ji hilbijartina Parlemana Kuweytê bûn. Piraniya jinên berendam ji xebatkarên warê mafê jinan di Kuweytê de ne.

Bînin ber çavê xwe, di welateke wekî Kuweytê de ku jin pareke barçav ji nifûsa wî welatê pêk tinin ji mafên xwe ên hiqûqî û siyasî hatibûn bêpar kirin. Di halekê de ku radeya dengderên jin ji mîran zafîr bûn (195000 jin li hember 145000 mîran), ev pîrse derdikeve holê ku çima jinan nekarî heta kursiyêke Parlemanê jî bi dest bixin?!

Bêguman kultura zal ya mîr serdestiyê di civaka Kuweytê de û hinek sedemên çandî û deb û edetên kevneşop ku di civaka Kuweytê de bi awayekê rih û bingeh dakutane ku heya jinên Kuweytê ne amade bûn dengê xwe bidin jinan û bikarin di yekemîn ceribîna hilbijartinê de ku jin tê de beşdar in, serkevtinê bidest bixin. Herçi qas jinên Kuweytê di vê gava dîroki de serkevtî nebûn, lê ji holê rakirina vê çandê û deb û edetan û nêrinên zal ên paşverû demeke zêdetir dixwaze.

Bi giştî em dikarin vê ceribîna hilbijartina Parlemana Kuweytê ku bo cara yekemîn di dîroka wî welatê de jinan jî mafê dengdanê hebû, gaweke erênî û pozetiv bihesibînin.

Di heman demê de divêt jinên Kuweytê bo ji nav birina van kosp û astengên pêşiya serkeftina xwe xebat û tekoşinê bidomînin û bi beşdariya çeleng ya xwe di tev warên civakê de roleke girîng bilizin.

Jin Di Ramana Rêberê Nemir Dr. Qasimlo De

"Di gavekê da ku jin çavkaniyêke herî xwedî hêz in bo hunermendan heta berheman biafrînin, hizr û bawerên kevin ên Xumênî meqamê jinan aniyê xwarê û ev kirine rihberekî bê véc, rihberek ku tenê jêhatî koyletiyê ye û neçar e di malê da heps be, heta xizmetê bi mîran bike û dûr ji civata

mîran domê bide jîne."
"Jin her çi qas pêtir di kar û barên civakî û siyasî de beşdariyê bikin, civak pêşketîtir û her çi qas di tevgera siyasî ya neteweyekê de jin pêşverû bin, ev tevger pêşketîtir û dê şans û bextê serkevtinê pêtir hebe."



Serdemê Bav Serdestiyê

Amadekar: Hemîd Muxtarî

Xwendevanên hêja, her wek hûn dizanin me di hejmara berê ya weşana Agirî de baseke kurt li

ser serdemê dayik serdestiyê pêşkêşî we kir û qîrar bû di vê hejmarê de em jî civaka dayik serdestiyê vegerin bo civaka bav serdestiyê û sebebên wê ji we re bidin ber şirove û dahurandinê.

Her wek me di hejmara berê de jî bas kir, bi wan serkeftinên ku jinan di warên, malbatî, aborî, perwerdehî, civakî û siyasî de bidestve anîn, dewranek di jiyana mirovahiye de dest pê kir ku bi navê serdemê Jin Serdestiyê (Dayîk Şahî) bi nav û deng bû, lê tevî vê yekê ku jinan karin wan serkeftinên xwe bi hezaran salan di civaka destpêkî ya mirovahiye de biparêzin, bi hinek sebebên ku emê niha jî we re binin ber bas, ev yeka nekarî heta heta bimîne û hêdi hêdi piştî dewranekê jî wekhevîbûn di desthilatê de, serdemê bav serdestiyê (bav şahî) dest pê kir ku niha jî nişaneyên wê bi awayekê tèn berçav.

Wil Durant dibêje: "Dubendiya berxwedaniyê ku îro rojê di navbera jin û mêr de tê ditin, di vê demê de gelek berçav nebû". Ev natebahiya pitir di rewşa jiyandê û xwezayê peyda bûye û di warê kûrî û zatî ve bi qasê hewce ne balkêş e. Jin di wê demê de di warê sebir û peydakirina rêya çareseriyê pirsgirêkan û dilêriyê tu jî mêr kêmîr nebûye û mêr weke alaveke cinsî (zayendî) jî jinê re nedinihêrî, belku canlibereke bihêz bûye ku kariye bi çendîn seetan bi encamdana karên dijwar û giran mijûl be û heta li dema pêwîst jî di rêya parastina zarokan û eşîra xwe de heta astê mirinê şer kiriye.

Lê piştî ku mêr bi her awayekê karî bibe xwediyê qawet û hinira zaf ya cendekî yan her jî destpêkê de xwediyê wê hinirê bû, karî bi mifah wergirtin jî xwe û bi bikaranîna heywanên barkêş, jinê rastî rewşeke cuda bike, bi awayekê ku bi xwe karin hêdi hêdi karên berhemaniyê li stû bigirin û jin ku hemû kare bû, piştî di malê de ma û mijûlê kar û barên nava malê bû. Bi vî

awayî mêr bû cihgirê jinê û serokatiya malbatê kete destê wî û piştî demeke kurt, serdemê bav serdestiyê dest pê kir.

Ji destpêka vê dewranê jî jin xwediyê mafê wekhev tevî mêr bû û hetanî dikarî aboriya malbatê birêve bibe, lê hêdi hêdi bi xurtbûna pezdari (xwedikirina malatan) û cotkariyê, bihagiraniya mêr roj bi roj zêdetir bû û seba hinek erkên pişeyî (senetî û hozanî) bo derveyî malê (yanî bo mêran), erkên nava malê yên



Wêne ji malpera chatrbaz.com hatiye wergirtin.

jinan kêmîr bûn û hêdi hêdi jî çarçoveya berhemaniyê bi wî awayî ku li berê hebû hate derê û tenê kar û barên xizmetkirin û selîqeyî di nava malê de jî bo jinê bicî ma.

Wil Durant vê yekê bi vî awayî şirove dike: "Dema ku pişesazî û cotkarî ber bi pêşve çû û kemilî û berhemên zaf bi destve anî, mêrî karî hêdi hêdi desthilata xwe li ser jinê xurt bike." Bi pêşkeftina teknîka xwedikirina heywanên kedi, çavkaniya nû ya dahatê kete destê mêrî de û bi vî awayî jiyana bihêztir bû û ewlehiyê zaf bi xwe ve dit. Hetanî cotkarî ku jî rêya sikur stûrên serdemê kevn ve weke kiriyareke bê biha dihate hesabandin, di encam de bala mêrî bi giştî jî bo aliyê xwe ve rakêşaye û desthilatdariya aborî ku dema xwe jinan di vê rêyê de bi destve anibû, jî dest wê de derbixe. Dest bi dest kirina rêveberiyê aborî ku heta vê demê jî aliyê jinê ve dihate encam dan, kete nava çarçoveya desthilata mêrî de, mafê dayikê li hember mafê bavî de xwe êxsir kir û rastî tîkçûnê hat û malbata bav şahî ku mêrê mezî yê malbatê rêveberê wê bû, di civakê de

weke yekîniya aborî, yasayî, siyasî û sincî hate naskirin, piraniya Xwediyên vê demê ku weke jinê dihatne çêkirin, piştî weke mêrên xwedî rih û rîşe hatne çêkirin ku di rastî de nişanderê bav û şêxên eşîrê bûn. Hatina serdemê bav şahiyê derbeyeke giran bo jî nav birina desthilata jinê tê hesabandin. Piştî wê demê jî bo zewicinê her çawa kole û xulam di nava bazarê de dikirin, bi wî awayî jin jî dikarî û li dema mirina mêr, jin jî weke milk û malê mêr bi mirat didan.

Sîstema bav serdestiyê ku tevî xwedîtiyê û dest bi dest kirina wê weke mîrata mêrane bû û her ev yeka mafê mêran û serokatiya gerdûnî, olî û siyasî ya wî

zêdetir kiriye û yasayên wisa pêk aniyê ku desthilatdariya wî hetanî niha jî didome.

Wil Durant dinivîse: "Di hemû ciheke erdê, bihagiraniya jiyana jinê jî mêrî kêmîr bûye û ger jinan keçek dibûn, ew rê û resma û cejna ku li dema jidayikbûna **kur** dihate girtin û birêve diçû, jî bo **keçan** tişteke wisa her tune bû".

Di serdemekê de ku jin pîroz bû, di vê dewranê de li

bal hinek eşîr qewm û gelan nemaze di dema ku jin di nava şûva xwe de bû, weke heyberek pîs û mirar dihate nihêrîn û heta rêya xwe şîştinê û paqijkirina xwe di nava avê de jî nedidanê.

Wil Durant derheq pirsên zayendiya mêran di vê dewranê de dibêje: "Mêr azad û dest vekirî bû ku li derveyî malê de tîkiliyên cinsî hebe, lê jin di sîstema bav serdestiyê diviya namûs û şerefa xwe heta dema zewicinê biparêze û piştî zewicinê jî diviya bi giştî bi mêrê xwe re emegdar bimîne û bi vî awayî jî bo rabûn û rûniştina her yek jî du cinsan (nêr-mê) çarçoveyakî sincî jî hev cuda pêk hat."

Wil Durant di warê vê çarçove çêkirinê de dibêje: Di hemû dirokê de em nikarin hetanî mînakekê li ser vê yekê peyda bikin ku civakê jî mêrî xwastibe ku heta dema zewicinê namûs û şerefa xwe biparêze û di hemû warekê de jin ketiyê ber bê hurmetî kirinê û bê qîmet bûye. Dewranek ku heta niha jî li piraniya welatên Rohilatî û bi taybet welatên Erebi û welatên weke Îranê de her berdewam e."

Nerazîbûn Li Hember Hebûna Mayînan û Navendên Leşkerî Li Serdeştê

Li gor agehiyên Rêxistina Mafê Mirovan li Kurdistanê, heftaya borî jineke Serdeştê bi navê **Sebrî Biryadî** bi sedema teqîna mayîne pîyêke xwe jî dest da. Navhatî hevjinê kedkareke belengaz û destkurt bi navê Ebabekr Mam Simayîlî ye. Gel li bajarê Serdeştê bi xurtî li hember hebûna navendên leşkerî li nêzik avahî û malan û ne paqijkirina qadên mayînan li vî



bajarî nerazî bûne. Raydar û organên rejîma Îslamî ya Îranê bo jî holê rakirina meydanên mayînan û dîrkirina navendên leşkerî jî cihê jiyana û akincibûna welatiyan tu gawe ne avêtine.

Hetanî niha jî bi dehan û sedan kes jî welatiyên Serdeştê û bajarên din dibin goriyên teqîn û telikên mayînan.

Albûma Cendekên Me

Evdile Koçer

evdilekocer@yahoo.com

Ê di her tişt kifş û eşkere ye,
êdî her tişt bêminetî ye looo...
Şerên ku mêrên berê dikirin,
li dû me ma.
Şerên nû li ber devê deriyê

me ne.

Îro her tişt wekî ekranên
televîzyonê li ber çavê me ye.
Belkî haya we jê hebe, lê em di sa ji
bi hev re bixwînin: "Zarokên ku li ser
sergoyekê nêzikî Bajaroka Încîrlîka
Edeneyê kaxez kom dikirin, li ser
sergo albûma wêneyan a leşkerekî
dîtin. Di albûma leşkerekî ku li herêma
leşkerî kiriye de, wêneyên endamên
PKK'ê yên înfazkirî cih digrin. Di
sergoyê de wêneyên bi xwîn ên
endamên PKK'ê ku di pevçûnan de
jiyana xwe ji dest dayînin kişandine û
xistine albûma xwe ya malbatê"
(çavkanî: **DÎHA**)

Ji me re albûmeke xweşik çêkirine:
Bi hovîtiya xwe ya nenaskirî ve, bi
faşizaniya xwe ya çiriyayî ve, bi qewl
û peymanên xwe yên bêlomeyî ve, bi
planên xwe yên gerinekî ve, bi
neyartiya xwe ya barbarî û bêserûberî
ve, vê albûmê neqîşandine.

Bi keşala devê xwe yê genî ve, bi
xwîna xwe ya herimî ve, navê xwe û
yên heft bavên xwe jî li ser vê albûmê
danîne.

Xûşk û birayên me yên ku wekî
çiyayên me xweşik yên ku dixwazin
xewnên xwe li zozanên Kurdistanê
bivejînin, yên ku dixwazin ji bermalên
xwe re stareke henûnok ava bikin,
dikevin ber xezeba wan û wekî gurên
hov dixin vê albûmê...

Bila êdî çiyayên me bi têra dilê xwe
bigirin.
Zimanê me yê ku di kaniya Melayê
Cizirî de dibû eşqa dilberê, yê ku di
şîn û şahiyên me de mala rihê me yê
herî mezin û xemrevîn bû, ji ber ku
nehiştin biharek bi ser ve bê her
weşiya û ket vê albûmê...

Êdî em wek lalan in gidînoo.
Çanda me ya ku di havînên
xalxalokî de di nav hevîyên şivanan re
bi stêrkan re hevaltî dikir ya ku li ber
diwarên neyaran jî her nefel dida, di
bin nîrê wan de qurmiçî û ket vê
albûmê...

Êdî havînên me bêriya stêrkan
nakin.
Çîrokên me yên ku di nav awirên



diyên me de pala xwe her didan
mereqa me, yên ku bi qehremanên
xwe yî maqûl ve xwe di nav bexçeyên
şevîgehên me de ji nû ve vedigotin,
tevna wan xira kirin û xistin vê
albûmê...

Êdî meşteleyên rihê me her ku diçe
bêtir diçilmisin.
Stranên me yên ku ji hezkiriyên me
re dibûn ramûsanên herî gulgulî,
heyranok û payîzokên me yên ku
Mem û Zînê di şevûrojê de
digihandin hev, ji nav me dizin û
xistin vê albûmê...

Êdî em li rastî Mem û Zînên kurdî
nayên.
Leyistikên me yên ku hîle û pileyên
zarokatiya me dipivandin, yên ku
şahidiya miziriyên ciwantiya me ya bê
eman dikirin, bi leyistikên xwe yên
hov ve pelîşandin û xistin vê
albûmê...

Êdî em ji hev re leyistikên neyarên
xwe ava dikin.
Gund û çiyayên me yên ku wekî
pirtûkên pîroz xwe di hembêza hev de
vedişartin, deşt û zozanên me yên ku
şervanan dikirin helbestvanê dilê xwe,
ji cigareya xwe re kirin pizotê agir û
xistin vê albûmê.

Yarî û tinazên me henek û
pêkenokên me yên ku bi awaza
tiqetiqên me ve her dem dibûn şeker û
çeçulatên feqîriya şevên me, rojekê
serê xwe dan haziran û xistin vê
albûmê.

Êdî em ji her demê bêtir feqîr û
belengaz in.

Êdî em wekî miriyên bê serî diçin û
tên.
Ji ber ku albûma hebûna me di
destê wan de ye.

RÊBER



H. Reşîdîyan- Oslo

Li geliyê xan bûye nalîn
Li Ormiyê de bûye kalîn

Li her derê bûye eyan
Dim dim şiyar kirin ewan

Ev çî nalîn û kalîne
Dar û bera dihêline

Jin rûniştine pişt dera
Rûçikandin tûka sera

Kîzan hêlan ebrî û poşî
Di qirînyan biperoşî

Bûkan hêlan cilên şipî
Negrêdan ewan kofî

Kelk hemû bûne peroš
Ber bûyerê bûne rşoš

Nalîn gehîşte serê çiyân
Li nav mîrgan û kaniyan

Nûçe çûbû nav hevalan
Li ser çiya û zozanan

Ber bûyerê bûne bêdeng
Kul diçûn û bibûn bêreng

Neşên bigirên aşkere
Çunke biryara rêbere

Biryara rêber ew bû
Ji şehîdan giriyan nebû

Li batî giriyanê wan re
Berneden rêka wan re

Eve çûbû hat serê me
Şehîd kirin rêberê me

Kanya avê me çik kirin
Bûyera berê dopat kirin

Doktor nav me de rakirin
Cihê wî nav gel vala kirin

Temenê xwe wî da ji dest
Ta gelê me bibe serbest

TÊGIHÊN FELSEFÎ

ADAR JIYAN

adarjiyan@mynet.com

Felsefe, pîvanga bikaranîna hizra mirov e. Her wiha pîvanga mējera zanîna hizra mirov e jî. Çi tēgih û


rēman dibe bila bibe, heta ku xwe nespêrin şîroveyeke hişmendî û li gorî raveyeke zaneyane û felsefî neyên navandin, tu car nikarin bigihîjin wateyeke xwe ya rastîn. Ji bo wê hewce ye ku hemû tēgih bi wateya xwe re li hev bin.

Di axaftin û bilêvkirina rojane de, mirov gelek caran pērgî peyv û tēgihên ku ji wateya xwe bi dūr ketine –an hatine bidûrxistin- dibe. Îcar ev tēgih jî bi hin rengdêrên awarte jî hev û din tēne veqetandin. Bo nimûne; gava behsa “demokrasi”yê tê kirin hin kes bê hemdê xwe dibêjin “demokrasiya rastîn”. Di vir de peyv û tēgeh bêhemd an jî dūrî ramina mirov tē bikaranîn û navandin. Gava ku mirov baş bifikire, tenê wateyeke “demokrasi”yê heye. Û di wateya wê jî “otokrasi” ye. Belê di wateya wê ne “demokrasiya ne rastîn e.” Ango gava ku demokrasiya rastîn hebe, teqez dê ya ne rastîn (a sexte) jî hebe. Belê gava ku mirov jî hêla felsefî ve lê binihêre qet tiştêkî wisa nîn e. Ji lewre demokrasi, xwediyê wateyeke misoger e. Û wateya wê ya rastîn jî tenê yek e. Yanî wateya demokrasiyê ya ne rastîn qet nîn e. Heke hebe jî ew ne wateya demokrasiyê ye.

Mirov dikare der barê wê yekê gelek mînakên şaş ên din jî bide: Wekî nimûne; “azadiya rastîn” û “azadiya ne rastîn”, “bindestiya rastîn û “bindestiya ne rastîn”, “têkoşîna rastîn” û “têkoşîna ne rastîn”, “şoreşa rastîn” û “şoreşa ne rastîn”, “hevalê rastîn” û “hevalê ne rastîn”, “dostê rastîn” û “dostê ne rastîn”, “dijminê rastîn” û dijminê ne rastîn û hwd.

Hin tēgih hene ku li gorî mējer û pîvanga xwe tēne ravekirin. Wekî mînak; “têkoşîneke xurt”, “têkoşîneke qels”; “tevgerêke xurt”, “tevgerêke qels”; “rêxistineke xurt”, “rêxistineke qels”, artêşeke xurt, “artêşeke qels” û hwd...Belê ev watedayîn jî bo tēgihên ku wateya wan a misoger hatiye dayîn, ne derbasbar e. Lewre, pîvang û mējera tēgihên mîna “azadî”, “demorasi”, “bawerî”, “şoreş”, “sosyalîzm”, “serxwebûn”ê û hwd. nîn e. Ew an bi wateya xwe ya misoger an jî bi di wateya xwe ya misoger tēne zanîn watedarkirin. Yanî mirov bi hêsani dikare bibêje, “tevger” “rêxistin” û “têkoşîn”eke “baş” an jî “ne baş” belê mirov nikare bibêje “azadî”, “demokrasi”, “bawerî”, “şoreş” û “sosyalîzm”eke “baş” an jî “ne baş”

Hin kes dibêjin: “Em jî bo azadiyeke rastîn tēdikoşin.” Gelo qey “azadiyeke ne



rastîn” an anga “azadiyeke sexte” jî heye? Na. Lewre, tēgiha “azadî”yê di wateya “bindestî”yê ye û pê watedar dibe. Bi vegotîneke din di jiyana kes an jî civakê de an azadî heye an jî bindestî. Girêdayê wê yekê mirovên wê civakê an azad an jî bindest in. Ne pêkan e ku him azad û him bindest bin. An jî hinekî azad û hinekî bindest bin. Belê pêkan e ku hin caran dilxweş û aram û hin caran jî diljar û xemgîn bin. Lewre “dilxweşî” û “xemgînî” du tēgihên dijber, belê her wiha guherbar in jî. Û ew li gorî mējera xwe diguherin. Lewre pêkan e ku mirov di heman rojê de him dilxweş û him jî xemgîn bibe. Belê de ne pêkan e ku di heman gavê him azad û him bindest bin. Mirovek, an azad e an jî bindest e. Bi heman awayî pergala rêveberiya civakê jî an demokratîk e an jî ne demokratîk e. Îcar mirov jî bo pergale nikare bibêje “hinekî demokratîk” an jî “zêde demokratîk” e.

Bi vegotîneke vekirîtir, mirov bi hêsani dikare tēgihên ku wateya wan a rastîn bi awayekî misoger hatiye dayîn, rave û şîrove bike. Wekî mînak, mirov nikare jî bo “av”ê bibêje ava rastîn û “ava ne rastîn” an “kevîrê rastîn” û “kevîrê ne rastîn”. Lewre tiştêk an “av” e an jî “ne av” e. Ji bok kevîr jî heman tişt derbas dibe; “an kevîr” e an jî “ne kevîr” e. Belê mirov nikare jî bo “başî”, “nebaşî”, “xweşî”, “nexweşî”, “rastî” û “ne rastî”yê heman tiştî bibêje. Çimkî pejirandina wate û şîroveya van tēgihan li gorî kesan digihere. Tiştêkî ku jî bo hin kesan baş be, dibe ku jî bo hin kesên din ne baş be. An jî tiştêkî ku bi hin kesan xweşik û bedew be; dibe ku bi hin kesên din zist û kereh(ne xweşik) be. Belê tēgihên ku wateya wan a rastîn û misoger jî hêla her kesî ve hatibe pejirandin û li gorî “rêbaza mantika formel” hatibe dayîn, nayên nîqaşkirin.

Çi tēgih û rēman dibe bila bibe, heke ku wateya wan i rastîn bi awayekî felsefî û zaneyane neyê danîn û ravekirin, dê pêwendîya navbera takekes û civakê biwêqe. Û girêdayî wê yekê jî dê ragihandin û tēgihîstina navbera mirovan her gav kûd bimîne û bilicime.

Kaniya Helbestan

Letif Epozdemir

PÊŞEWAZÎ

bende û dilê zeman im
bijang wek tîr ebrû kewan
kezya berde ku bi reqşin
bisk û gulî bèn himatê.

Şûr bi dest diwar bi hestî
Bihara min neke zivistan
Dilovanî bê mirin e
Xwe dūr neke jî sebatê

Her carek ku sing diheje
Zelzele dikeve nav dil
Bi dîdarek sermest dibim
Derkeve nava civatê.

Ji hezaran dert re heye
Kûl û şehînek bo sebeb
Kirasê agir li me ye
Lewra dil nake tebatê.

Agirê zerdeştî bi nav im
Dişewite cerg û dil
Şev û rojan xew betal e
Naweste qet jî lebatê..

Meke gazin ey dilbera gerdên
bi xal
Fesal tune nîne mecal
Wê bihar bê vebîn kulîlk
Herkes kûbar bi felatê.

BÎRANÎN

ji bîr nabe ew rewşa kûbar
bê miraz man e îro cî û war
sed qeda li wê qedera dest bi
dar
ku wiha me dihêle bê dost û
yar.

Digel hev wek kela bûn
Ne hilwêşin bi derban
Bi dû hev ketin, çûn
Ken ma li ser lêvê wan.

Ey felek

te bi çavên birçî
jiyanê kiryê mîrat
mirin her para me ma
tarî bûne zilomat
bes êdî me navê
şin û giryanê
vayê roja me hilat
me hezaran Nûredîn hene
hemû Yawûz dil polad

"ŞÎROVEYA DÎWANA MELAYÊ CIZÎRÎ" DERKET

Pîştî demeke dirêj diwana helbestvanê navdar yê Kurd, **Melayê Cizîrî** bi şîroveya Kurmancî ji aliyê Enistîtuya Kurdî ya Stenbolê hate çap

ji naveroka wan berheman fêm bike û çêjekê ji wan bigire.

Ji bo dagirtina vê valahiyê gelek kesan berhemên wêjekarên klasîk

û weşandin.

Wêjeya klasîk a kurdî di nav kelepura zimane kurdî de cihekî taybet digire. Di nav wêjeya klasîk de jî çend nav hene ku berî her kesî têne bîra mirov. Ew kes xwediyê şahkar û berhemên bêhempa ne. Meleya Cizîrî yek ji wan navan e. Lê mixabîna nîfşên nû nikarin sûdê ji wan berhemên klasîk wergirin, ji ber ku di berhemên klasîk de zimanekî aloz û tijî peyvên erebî û farisî hatiye bikaranîn. Kesên ku van berheman bixwînin divê hem bi zimanê erebî û farisî bizanin, hem jî haya wan ji raman û felsefeyên wê demê hebe. Lê ji bilî kesên pişpor kes nikare



şîrove kirine. Diwana Ehmedê Xanî, berhema Ehmedê Xanî ya bi nav û deng **Mem û Zîn** ji hêla gelek kesan ve hatine şîrovekirin. Her wiha Diwana Melayê Cizîrî jî bi zimanên cur bi cur hatibû şîrovekirin. Di kurdî de jî Hejar Mukriyanî şîroveya wê bi zaravayê soranî kiribû, lê bi zaravayê kurmancî şîroveya wê

nehatibû kirin. Seyda **Celalettin Yoyler** ev valahî dagirt û hemû helbestên di diwana Melayê Cizîrî de bi kurmancî şîrove kirin û di nav pirtûkekê de pêşkêşî gelê xwe kirin. Ev pirtûk jî nav **Weşanên Enistîtuya Kurdî ya Stenbolê** derket. Pirtûk jî 1087 rûpelan pêk tê, li ser kaxiza spî hatiye çapkirin û cilda wê jî çermîn e.

Di destpêka pirtûkê de pêşî li ser jînenîgariya Melayê Cizîrî agahî hatine dayîn, mijara jîdayikbûna Melayê Cizîrî li gorî hesabê ebcedê



Nivîskarê "**ŞÎROVEYA DÎWANA MELAYÊ CIZÎRÎ**", **Celalettin Yoyler**

hatiye ronîkirin. Wisa xuya dike ku dê hezkiriyên wêjeya kurdî karibin ji helbestên Melayê Cizîrî bi hêsani fêm bikin û ji wan tam û çêjekê wergirin.

Em tevî pîrozbahiyên germ yê xebatkarê weşana **Agirî** ji Nivîskar **Celalettin Yoyler** re bona encamdana vî karê mezin û pîroz, hêviya serkevtinê ji vî wêjevanê kurd û zehmetkêş bi hêvî dixwazin.

Jêder: Enistîtuya Kurdî ya Stenbolê

Bersiva Sudoku a Hejmar 42'an

9	2	4	7	3	5	6	8	1
1	8	6	9	2	4	3	7	5
3	7	5	8	6	1	4	9	2
8	1	3	6	4	9	5	2	7
5	9	7	2	8	3	1	6	4
4	6	2	5	1	7	8	3	9
6	5	1	3	7	2	9	4	8
7	3	9	4	5	8	2	1	6
2	4	8	1	9	6	7	5	3

Ji bo bersivdana Xaçepirsa hejmaran (Sudoku)yê ya nû, tenê van sê xalên jêrîn berçav bigirin:

1. Hejmarên 1-9'ê di xet(xêz) û stûna serjêr tenê carekê dubare dibe.
2. Hejmarên 1-9'ê di xet(xêz) û stûna çeprast de tenê carekê dubare dibe.
3. Hejmarên 1-9'ê di nava çargoşeke 3x3 de tenê carekê dubare dibe.

Xaçepirsa Hejmaran (Sudoku)

		9	6	1	4	2		8
	6							3
7		4	3		2	9	1	
6		5	4				8	2
8				6	1		9	
4		7		2				1
1		8				4	6	9
		2	1	4		8	3	7
3	4		9		7	1	2	

Civîna Parîsê Ya Welatên 5 + 1, Dosya Etomî Ya Îranê Bo Konseya Ewlekariyê Vegerand

W ezîrên Derve yên 5 welatên endamên dayim ên Konseya

Ewlekariyê û Almaniya di necama civîna xwe ya Parîsê, di roja 12.07.2006'an de, biryar girtin dosya Etomî ya Îranê dubare ji Konseya Ewlekariya Rêxistina Neteweyên Yekbûyî re bihê vegerandin.

Ev biryare ji ber vê çendê bû ku Îranê bersiveke eşkere û zelal neda welatên han û careke din wext û derfeta bersivdayîna derheq pêşniyarên hayder yên welatên 5+1 heya nîva vê mehê paş de xist.

Filîp Dost Bilazî, Wezîrê Karê Derve yê Fransayê û berdevkê civîna Parîsê eyan kir, heke Îran bersiveke neyînî bide civaka navneteweyî, ew dê pêşniyarbiryarekê di Konseya Ewlekariyê de binin ber bas ku ceza û dorpeçkirinên aborî dijî dewleta Îslamî ya Îranê werin meşandin.

Komara Îslamî dixwaze bi vê cure diplomasiyê tenê demê bikire û bîkujê, hetanî bikare bi qasê hewce Uraniyûmê bi dest bixê û çekên Etomî çê bike. Ev gava Îranê gef û xetereke mezin bo ser tenahî û aştiya cihanê û herêmê ye. Ev rejîmê dixwaze civaka navneteweyî bixapîne.



Kongreya Çapemeniyê ya welatên 5+1 li Parîsê piştî bi dawî hatin civînê

Daxuyaniyek Ji Hunermend Şivan Perwer

Ji bo gelek tişt bi xeletî neyên fêhmkirin, ez mecbûr im vê daxuyaniyê agahdarî dost û guhdaran bikim.

Bi hunermend Gulistan re ji nêz a dûr ve danûstandin û têkiliyeke min a şexsî û hunerî nema ye û tune ye.

Zêdeyî 8 salan e em ji hev cida ne û hatine berdan. Ji ber vê yekê ye û hewce nake ku di warê jiyana taybetî de yan ji bo xebat û xizmeta hunerî destur û daxwazî ji şexsê min bête xwestin.

Hunermend Gulistan di jiyana xwe ya taybetî de azad û di danûstandin û têkiliyên xwe de bi biryar e.

Ez hêvîdar im ku dost, heval û guhdarên min li ser vê



mijarê serwest û agahdar bin.

Şivan Perwer bi bahweriya gel û welat, bi hunera xwe herdem di xizmeta we de ye.

Rêz û aşî,
Şivan Perwer

Zanist û Teknolojî

“Adobe” Ew Kunên Ku Di “PDF Rader” De Heye Pero Dike

Hamid Durûdî

Du kunên gelek bizîrê ku hetanî niha di “Adobe Acrobat” û “Adobe Reader”ê de bûn, hatine peydakirin û ji aliyê “Adobe”ê ku ev pirogeremane çê kirine, ji wan re çareserî hate peyda kirin. Lewra “Adobe” di peyamekê de nivîsandiye ku bikarînerên her du sisteman yanî “Windows” û “Mac”ê bi sedema bikaranîna ev du pirogeremane, rastî pirsgirêkan hatine.

Rewşa herî xirab ya wan tûşbûnane demekê ye ku mirov rûpeleke “PDF”ê çê dike an ji bo vekirina wê hewcehî bi “Adobe Reader”ê hebe. Çûnkî di wan demane de hinek rawestan pêk tê û li wir de ji ye ku kodeke bi zîyan bi awayê “buffert”ê çê dibe.

Divêt eva ji were gotin ku ev kunane di weşanên “6.04” û “6.05”ê de hene, lewra çêtir eva ye ev kesên ku weşanên 6.00 hetanî 6.04’ê bikar tînin, divêt hindî zû wan programan nû bikin, nexwe dikarin di malpera “Adobe”ê de weşanên nû dabigrin û di kompyoterê yan CD û hwd cih bikin.

“Microsoft” Tê Kurdistanê

Hikûmeta Herêma Kurdistanê ji bo pêşketina navend û dezgehên Kurdistanê herdem di hewl û cehdê de ye û vê dawiyê hevhatinek tevî şirketa “Microsoft”ê girê da. Di vê derheqê de Azad Geylanî, Ravêjkarê Serok Wezîrê Kurdistanê bo kar û barê peywendî û teknolojiyê got: “Proje pêk hatiye ji avakirina navendeke teknolojiyê di warê “Ict”yê ji aliyê Hikûmeta Kurdistanê û bi alikariya şirketa “Microsoft”ê li ser asta navendên giştî yên perwerde û fêrkirinê û beşa taybetî tevî piştgirîkirina zimanê Kurdî di



berhemên “Microsoft”ê de.”
Hêjayî gotinê ye ku şirketa “Microsoft”ê yek ji kompaniyên mezin yên cihanê di warê Kompyoterê de ye.

Rêxistina Mafê Mirovan Li Kurdistanê: Divêt Hukmê Bêparkirina Xwendekaran Betal Bibe

Ji bo kom û saziyên ewlekarî û dadê di zanîngehan de

Di heyamê wan çend rojên dawiyê de hejmarek ji çalakvanên xwendekar yên Kurd di zanîngehên Kurdistanê de ji domandina xwendinê hatine bêpar kirin yan tevî ceza û zext û givaşê ve berbirû bûne. Di encama destbiser kirina xwendekarek Kurd bi navê Yasir Gulî, du xwendekarên Kurd bi navê Aso Salih û Esed Baqîrî her yek bi sal û nîvekê bêparî ji domandina xwendinê û çend xwendekarên din ji bi terzên din hatin mehkûm kirin.

Rêxistina Berevanî ji Mafê Mirovan li Kurdistanê tevî eynakirina xemgîni û nerazibûna xwe ji van kiryar û hukmanê ji aliyê saziyên ewlekarî û dadê di cihên rewşenbîrî û zanîngehan de, gef û zextên li ser xwendekaran û bêparkirina wan ji domandina xwendinê, pêşgîrî ji çalakiyên çandî û medenî bi bêparkirina wan ji mafên welatîbûnê û dijî bend û yasayên navneteweyî yên mafê mirovan dide zanin. Ev rêxistine xwaziyê vekirin û hilgirtina van biryar û hukmên li ser bêparkirin ji xwendin û kosp û asteng li pêşya çalakiyên medenî a xwendekarên Kurd e.